



**13 de setembro de 2012.** ADEGA quere expresar a súa solidariedade con veciño de Cambados Lois Baúlo, que vén de ser **multado polo concello con 80€** por tentar eliminar unha **herba da Pampa** mata de

(*Cortaderia selloana*

), popularmente coñecida como "plumachos", especie exótica de alto potencial invasor. Lois Baúlo, técnico ambiental formado no Centro de Formación Agroforestal de Lourizán, é tamén un activo colaborador do movemento ecoloxista e ten participado en numerosos programas de voluntariado ambiental de ADEGA, nomeadamente para a

[erradicación das especies exóticas e invasoras](#)

. Dende ADEGA

**pedimos ao concello de Cambados que retire esta sanción**

e que, lonxe de reprimir ás persoas que perante a inacción institucional tentan preservar a nosa biodiversidade, cumpra coa responsabilidade de erradicar as especies exóticas e invasoras.

A acción do noso compañeiro Lois vén de poñer de manifesto o desinterese e o descoñecemento das institucións polo que atinxe ás especies exóticas e invasoras. Dase a circunstancia de que hai uns días (10 e 11 de setembro) celebrouse en Pontevedra o [4º congreso estatal de especies exóticas e invasoras](#)

no que participou ADEGA-Proxecto Ríos, cunha comunicación encol do destacado papel do voluntariado na loita contra as invasións biolóxicas, como prólogo ao

[congreso Neobiota 2012](#)

.

Mentres a comunidade científica e as organizacións conservacionistas acendemos as alarmas sobre as nefastas consecuencias desta "globalización biolóxica" e a introdución de especies exóticas e invasoras, principal causa actual da perda de biodiversidade, as administracións semellan non estar á altura deste desafío. Plantas, insectos, moluscos, vertebrados e aínda fungos e fieitos usan as actividades humanas (tráfico de especies, transporte, aplicacións comerciais ou mesmo actividades de lecer e xardinería ornamental) como vector para a conquista de novos hábitats, xerando [importantes danos económicos e por suposto ecolóxicos](#)

O descoñecemento, a tolerancia e mesmo a introdución accidental ou por descoñecemento que algunhas administracións practican coas especies invasoras, están a poñer en perigo o noso patrimonio natural e poden supoñer tamén importantes perdas económicas para as arcas públicas. Fronte a esta preocupante realidade, a formación, a información pública e a educación ambiental para a implicación activa da cidadanía nesta problemática é tanto ou máis importante que os recursos que as administracións (moi insuficientes) están adicar á loita contra as bioinvasións.

Por iso dende ADEGA lamentamos a desafortunada actuación do concello de Cambados, multando a un dos seus veciños por tomar a iniciativa para defender o noso ambiente, e pedimos que se retire a sanción. De calquera xeito e de confirmarse a multa, Lois Baúlo, socio de ADEGA, non a terá que pagar do seu peto. **Defender a nosa Terra non é delicto!**